

“Mbwn haemh roeg haeuj rongz, cieng daengz vunz lienh gya.” Hanzgyaj seizgan dinjdet, yaek daengz cieng lij aeu daeuj hagsib beizyin, daihgya baez hainduj couh mbouj cingznyiengh geijlai. Miz geij boux doengzhag maij gaujriu, mingzmingz rox mbouj miz yungh lij youq Q gyoengq caeuq lauxsae daez yigen, yauhgiuz gvaq cieng cij beizyin. Gizsaed, daihgya bouxlawz mbouj rox, haeuj cieng le aeu dajcunz baiqnienz, daihgya engq mbouj sijndaej biek ranz daeuj hagsib lo. Ndigah, haujlai doengzhag yienznaeuz daeuj daengz Namzningz hagsib, hix lumj cij daeuj guh soq nei, ndojndoj ndaijndaij daeuj le, youh sikhaek yaep fwngz naemj suenq baenzlawz vaiq di baema.

Caen dwg siengj ranz singip ha. Ndwenlab ngeihcib seiq, lajbyongh-ngoenz haj diemj, ngamq hwnj dangz sat, haujlai doengzhag cungj aeu soemh haemh baema. Heiyu, gou caen caengz raen gvaq, daihgya cungj miz banhfap soemh haemh baema——

Cinhyin Maranz

春运回家

□Ganh Sozvwenz/甘说文

mizmbangj gag hai ci, mizmbangj daj ndaw ranz cingj “swhgih” hai ci daeuj ciep, mizmbangj caeuxcaeux dingh cawx feici haemh, bouxlawz hix mbouj lau gwnz loh saek ci……cici caca, bubu lulu, lumj gyoengq roeg haemh cauz haeuj mbong nei, cauzhuhu, nyaengqnyatnyat, luenhlablab. Youq ndaw hagdangz Minzda, gwnz loh song mbiengj gofaex fuemxfubfub haenx, gyaqgyaq ciq dap rim vunz, baihlaeng fot dwk heiqlhoenz riengjret hai deuz, lumj raq hoenz ndeu baez yaepda couh mbouj raen saek di raemhraeuz lo. Gou gig geizheih, mbouj rox vihmaz daihgya sawqmw h bouboux cungj miz ciq lo, ndaw

singz daihloh hix doengdat mbouj saek saekdi lo, cij laihaeuz “cienzmienh siujgangh sevei” daezgonq daeuj daengz lune.

Ma daengz suzse, daengx aen suzse geij boux doengzhag Laizbinh engq nyaux ndaej vunz ndawsim fouzfab luenhlab. Gyoengqde bonjlaiz daezgonq cawx gvaq feihojceh banringz, aenvih lauxsae mbouj hawj daezgonq baema, youh gaij ciem daengz ngoenzcog, gangj ndei haemh neix lij youq gizneix ninz haemh ndeu. Seizneix, raen daihgya cungj soemh haemh baema, youh naengh mbouj onj lo, couh baij daihyauj bae gaij ciem feihojceh, hix aeu soemh haemh baema. Aenvih haemh le mbouj doiq ndaej fuengz, couh heuh gou ngoenzcog bang gyoengqde dawz doxgaiq gwnz congz bae doiq.

Daihgya cungj deuz lo, ndaw hagdangz sikhaek bienq ndaej hoengqhaenghaeng cingxngaungau. Rumznit cisausau, raemhfaex doengh-yabyab, daengx doengh laeuz lumj cij lw gou caeuq doengz suzse yah doengzhag Fangh lauxsae daiq lwgmbwk daj Ginhcouh daeuj haenx, rog coujlangz gij daeng haenx hix lumj gyoj haulai lo. Gij gadog youq rog

fubfeb louzlangh haenx gaen dwk gij heiq nit raq dem raq ci daeuj. Gou dwg mbouj dwg daiq nyaeknye lo, simcingz cungj deng seizheiq vanzging gaem ndaeng yien dwk byaij?

Fangh lauxsae yienznaeuz coz, hoeng gig caemdingh, vunz gip de mbouj gip, vunz muengz de mbouj muengz. Gvan de ngoenzcog cij daeuj ciep de mehlwg baema, ndigah de soqlaiz cungj caemdingh, mboujguenj daihgya baenzlawz nauh baenzlawz vueng, de sim cungj mbouj doengh saekdi. De moix ngoenz lij hwnj caeux guh genmeijcauh ne, dahlwg de caeuq de ityiengh vaiqvued, caengz gangj vah naj sien riu gonq. Seizneix, youq laj daeng ronghsag, yawj raen gij naj hai songde, gou youh gamj daengz mizdi raeujrub lo.

Ngoenzlwenz haetcaeux gou swiq byoemgyaeuj, mboujmiz dencuihfungh daeuj ci sau, nyex deng nitgengx, seizneix bingh fat naek lo, youh ae youh fatndat. Yawj baihrog laep-cupcup mbouj miz saek vunz, naemjnaemj haetcog couh ndaej baema lo, couh cenggengz dingj dwk mbouj bae cawx yw—— gangj saedcaih, youq Minzda, gou lij caen mbouj rox seizneix gizlawz miz yw gai.

Fangh lauxsae nden hawj gou ywganjmau, gangj dwg daj ndawranz daiq daeuj. Yawj dwk gij riunyumj de cungj dwg yienghneix seuqcingh unqswnh, gou gag danq: Lauheiq cingq dwg gij singq ndeigangj de sawj de baenzneix caemdingh, saeqsim ndeism,caeuq vunz doxhuz ba.

(caengz sat)

Dujva Sawcuengh Gyaeu

壮文花几艳

□Veiz Ginzveih/韦群辉

Dujva Sawcuengh ndei
Ciengzseiz rang youh moq
Rang doh daengx guekcoj
Daengz gak hoh gak ranz

Vah youh gangj dauqma
Va Sawcuengh hoengzmaeq
Seng youq sinh sevei
Dingj ndaej fwn ndaej rumz

Miz di vunz mbouj rox
Laihnaeuz boq daihvah
Youq dieg Cuengh hai va
Guhmaz rang doh guek

Mwh cib bi doenghluenh
Sawcuengh hix deng cai
Caen yungyiemj dahraix
Caeklaiq rag de raez

Cunghyangh gozvuyen
Daj senq seiz ung ceh
Ngamq didngaz dok nye
Couh ce hawj ngaenzhangz


Doenggvaq cin dauqdaeuj
Mbwn raeuj fwnraemx lai
Vah Sawcuengh fuk hai
Rang daihdeih guek raeuz

Yaenq youq laeng ngaenzceij
Loegcib geij cin cou
Bingz ngaenz moq ngaenz gaeuq
Mbawmbaw miz Sawcuengh

Guekgya gwnz daengz laj
Demgya lai vunz ganq
Suenva haeuj hagdangz
Va hai rang engq moq

Haujlai vunz ndi rox
Sawcuengh yo ndaw ranz
Yo ndaw daeh gwnz ndang
Gaem gyangfwngz gai cawx

Dujva Sawcuengh ndei
Seiqgeiq maeq youh hoengz
Cin hah daengz cou doeng
Ciengxlwenx hoengz ndi bienq



Mbanjranz Gyaeunde

Veiz Gozcingh Sangcieng Cawj-guenj Guengjsae Ngeihcib Bi

韦国清上将主政广西二十年

□Hoz Saubangjsij Cioz Siengzcoub Liuz Gingliuj Cioz Siengzzen boiz

Boux suhgi laux、cujsiz laux Cangh Yinzyi caemh haemq gvansim laebdaeb hwnj diuz giuzhung neix, de caemhcaiq raiz saenq hawj Lij Fucunh fucungilij, genyi Guekgya Giveij bangdingi.

Bihaenx ndwen 4 ngoenz 25, Guekgya Giveij cingqsik han naeuz: Gij saenq Yinzyi dungzci caeuq Gozcingh daengj dungzci raiz hawj Fucunh caeuq Cinz Yi dungzci haenx gaenq sou daengz. Doengzeiq cuengq guh diuz giuzhung neix haeuj gij giva hwnjguh goekdae bi 1963 bae, laebdaeb guh dem. Lij buet le ngaenz、gangcaiz caeuq suijniz hawj hangh hongloet neix.

Aenvih ngaenzgoek caeuq sam caiz cungj daengzvi h lo, hwnj diuz giuz neix ndaej daihdaih gyavaiq. Veiz Gozcingh doenghbaez bae dieghong ngonczaz gvaq, dingq gij vunz-gaemhong dieghong gyoeblnh, bang

gyoengqde gejnanz.

Bi 1964 ndwen 7 ngoenz 15, gij hongloet cawjdae giuzhung gezgou ganggingh vwnningzduj, yiengh caet congh venjgen, raez gyawj 400 maex haenx guh baenz, caemhcaiq hawj vunz byaij. Daj neix hwnj, songhenz Dahyunghgyangh Namzningz Si ciengzgeiz baengh naengh ruz gvaq dah duenh lizsij neix satbyai lo.

Ndae diuz giuz gvaq dah ndeu, dwg aen siengjmuengh lai bi daeuj vunzlai ndaw singz Namzningz ndeu.

Giuzhung cingqsik doeng ci ngoenzde, vunzvunz angqyangz vuenheij, daj seiqmienh betbah doxcanj buet coh gwnzgiuz, lumhmo gij gungjgiuz hausak, saeqyawj gij doz miz daegsaek Bouxcuengh gwnz lanzgiuz haenx, haenhdanq mbouj liux.

Veiz Gozcingh diuhliz Guengjsae gvaqlaeng, buenxdoengz gaijgwz hai-langh caeuq ginghci fazcanj, 80 nienzdaih caeuq 90 nienzdaih youh gonqlaeng hwnj le Giuz 2、Giuz 3、Giuz 4 Yunghgyangh. Diuz Giuzhung

Yunghgyangh 30 lai bi gonq guh baenz haenx, gaenq bienq baenz Giuz 1 Yunghgyangh lo, seizneix de ciuqgaeuq rap dwk gij hongnaek guh diuzroen cujyau gyaudoeng namzbaek Namzningz Si haenx.

Giuzhung Yunghgyangh guh baenz mbouj geij nanz, bi 1966 ndwen 2 youq baihnanz de hwnj le aen gaiqcaep hungsang ndeu—Guengjsae Dijyuzgvanj.

(caengz sat)